



# PYETJE & PERGJIGJE

kalvinizmi

Më ka bërë përshtypje një varg tek 1 Samuelit 2, vargu 25: “Por ata nuk e dëgjuan zërin e atit të tyre, sepse Zoti dëshironte të vdisnin”. E njëjta gjë ka ndodhur dhe me faraonin e Egjiptit ku Zoti ia ngurtësonte zemrën. Për një moment më bëri të mendoj se ne nuk kemi shumë në dorë. Në kuptimin që ÇDO GJË ËSHTË E VENDOSUR, N.Q.S. JEMI TË MIRË A TË KËQIJ. ÇDO GJË ËSHTË E PARAKTUAR. Zoti dëshironte që ata të vdisnin! Çfarë mendoni ju?

Komentari i Biblës për Besimtarët i autorit William MacDonald thotë:

Eli nuk i qortoi bijtë e tij derisa dëgjoji lajmet e imoralitetit të tyre. Por tashmë ishte shumë vonë për qortimin e tij të butë gojor. Ata ngurtësuan zemrat e tyre dhe kështu u ngurtësuan jo pa qëllim, ashtu si faraoni i lashtë, sepse Perëndia kishte vendosur t'i shfaroste. Gjatë kësaj kohe Samueli po rritej qetësisht, pastërtia dhe mirësia e tij i pëlqente Zotit dhe njerëzve. Nëse kujtojmë se këto ngjarje kanë ndodhur gjatë kohës së gjyqtarëve, nuk është për t'u çuditur që priftëria nuk ia arriti të shpëtonte nga rënia morale e asaj periudhe.

Ideja është që bijtë e Elit vazhduan vit pas viti duke mëkatuar. Në fillim ata i ngurtësuan vetë zemrat e tyre. Por Perëndia, siç ka bërë edhe me Faraonin, kur njerëzit kalojnë shumë kohë duke e kundërshtuar Perëndinë, duke ngurtësuar zemrat e tyre, Perëndia zemërohet dhe fillon vetë të ngurtësojë zemrat e njerëzve. Në këtë rast, bijtë e Elit ishin aq keq duke arritur shumë thellë në ngurtësimin e vetvetes (me ndihmën e Zotit) që Perëndia dëshironte të vdisnin. Ata ishin një pengesë për Izraelin dhe duhet të hiqeshin nga mesi i tyre. Në raste të tilla, Perëndia ka të drejtë t'i kundërshtojë mëkatarët. Nuk është çështje paraktimi, por rebelimi kundër Perëndisë me pasojat që vijnë më pas, d.m.th., ngurtësimi i zemrës nga vetvetja dhe pastaj nga Perëndia. Mësimi është: duhet të kemi kujdes në jetën tonë dhe duhet të ecim me përlësi përpara Perëndisë.

Në lidhje me frazën “sepse Zoti do t'i vriste ata” (Versioni i Autorizuar), Adam Clarke thotë:

Pjesorja ki, që ne e përkthejmë sepse, dhe kështu e bëjmë vazhdimësinë e tyre në mëkat pasojën e vendosmërisë së Perëndisë për t'i shkatërruar ata, duhet të përkthehet prandaj, sikurse do të thotë në shumë pjesë të shkrimeve të shenjta. Ishte mosdëgjimi i tyre që e shtyu Zotin të dëshironte shkatërrimin e tyre.

Ç'mund të themi për faraonin? Në librin e tij Çfarë dashurie është kjo? Shtrembërimi kalvinist i Perëndisë, Dave Hunt thotë:

Perëndia e njohte që më parë zemrën e keqe dhe vetëdashëse të këtij tirani dhe kjo është arsyeja që Perëndia e ngriti atë në këtë kohë të caktuar: “Por, pikërisht për këtë arsye të kam ngritur, për të treguar fuqinë time dhe që emri im të shpallet në gjithë dheun” (Eks. 9:16, Versioni i Autorizuar). Perëndia e përdori zemrën fodulle e krenare të faraonit për të gjykuar plotësisht tërë perënditë e Egjiptit, gjatë procesit të çlirimit të popullit të Tij nga ajo tokë pagane.

Perëndia nuk e shkaktoi faraonin të mëkatonte, por i organizoi rrethanat dhe ngjarjet që ta vendoste pikërisht këtë njeri (sjelljen dhe shtysat e këqija të të cilit Ai i dinte që më parë me hollësi) që të ishte në pushtet në atë kohë të caktuar, që të përdorte ligësinë e tij [të faraonit] për të përmbushur vullnetin e Tij. Ne i pohojmë si biblike dhe të arsyeshme aftësinë e Perëndisë dhe të drejtën e Tij sovrane për t’i organizuar rrethanat dhe për t’i vendosur në skenën e jetës ata lojtarë të cilët ai i njeh që më parë, me qëllim që vullneti i Tij të kryhet në çështjet njerëzore—dhe këtë ta bëjë pa shkelur vullnetin e tyre apo pa nxitur krimet e tyre (dhe aq më pak që të bëhet bashkëfajtor me ta).

As nuk u shkaktoan veprimet e faraonit nga Perëndia; Ai thjesht e lejoi të keqen e faraonit të vazhdonte në rrugën e saj, madje duke forcuar vendosmërinë e keqe të faraonit deri atje sa ajo të përmbushte qëllimin e vetë Perëndisë.

Ka vetëm një shpjegim biblik që Perëndia i merr disa në qiell dhe i dërgon të tjerët në ferr: Shpëtimi është një ofertë e vërtetë, dhe Perëndia, në paranjohjen e Tij dijeplotë, e di se si do të përgjigjet çdo njeri.